

列女志

后妃

明仁宗張皇后永城人父麒以女貴追封彭城伯洪武十六年封燕世子妃永樂二年封皇太子妃仁宗立冊爲皇后宣宗卽位尊爲皇太后英宗卽位尊爲太皇太后后始爲太子妃操婦道至謹雅得成祖及徐皇后懽太子數爲漢趙二王所閒體肥碩不能騎射成祖恚至減太子宮膳瀕易者屢矣卒以后故得不廢及立爲后中外政事莫不周知宣德初軍國大議多稟聽裁決是時

海內景泰帝入奉起居出奉遊宴四方貢獻雖微物必先上皇太后兩宮慈孝聞天下三年太后遊西苑皇后皇妃侍帝親掖輿登萬歲山奉觴上壽獻詩頌德又明年謁長獻二陵帝親囊韉騎導至河橋下馬扶輦畿民夾道拜觀陵旁老穉皆山呼拜迎太后顧曰百姓戴君以能安之耳皇帝宜重念及還過農家召老婦問生業賜鈔幣有獻蔬食酒漿者取以賜帝曰此田家味也從臣英國公張輔尙書蹇義大學士楊士奇楊榮金幼孜楊溥請見行殿太后慰勞之且曰爾等先朝舊人勉輔嗣君他日帝謂士奇曰皇太后謁陵還道汝輩行事甚

習言輔武臣也達大義義重厚小心第寡斷汝克正言
無避忤先帝或數不樂然後從汝以不敗事又有三事
時悔不從也太后遇外家嚴弟昇至瀋謹不許預議國
事宣宗崩英宗方九歲宮中訛言將召立襄王矣太后
趣召諸大臣至乾清宮指太子泣曰此新天子也羣臣
呼萬歲浮言皆息大臣請太后垂簾聽政太后曰毋壞
祖宗法第悉罷一切不急務時時勗帝向學委任股肱
以故王振雖寵於帝終太后世不敢專大政正統七年
十月崩當大漸召士奇溥入命中官問國家尙有何大
事未辦者士奇舉三事一謂建庶人雖亡當修實錄一

謂太宗詔有收方孝孺諸臣遺書者死宜弛其禁其三
未及奏上而太后已崩遺詔勉大臣佐帝惇行仁政語
甚諄篤上尊諡曰誠孝恭肅明德宏仁啟聖昭皇后合
葬獻陵祔太廟

宣宗孫皇后元鄉平人幼有美色父忠官永城縣主簿入
永城籍誠孝張皇太后故永城人言忠有賢女遂得入
官方十餘歲成祖命張皇后育之已而宣宗婚詔選濟
甯胡氏爲妃而以孫氏爲嬪宣宗卽位封貴妃故事皇
后金寶金冊貴妃以下有冊無寶妃有寵宣德元年五
月帝請於太后製金寶賜焉貴妃有寶自此始

子陰取宮人子爲己子卽英宗也由是眷寵益重胡后上表遜位請早定國本妃僞辭曰后病痊自有子吾子敢先后子耶三年三月胡后廢遂冊爲皇后英宗立尊爲皇太后英宗北狩太后命邸王監國景帝卽位尊爲上聖皇太后時英宗在迤北數寄禦寒衣裘及還幽南宮太后數入省視石亨等謀奪門先密白太后許之英宗復辟上徽號曰聖烈慈壽皇太后明興宮闈徽號自此始天順六年九月崩上尊諡曰孝恭懿憲慈仁莊烈齊天配聖章皇后合葬景陵祔太廟而英宗生母人卒無知之者

孝婦

陳氏鄭府紀善張瑤妻事姑王氏艱苦備至及瑤仕甯州學訓姑老不能從陳願留奉養又爲夫娶妾常氏隨任供內事陳在家事姑姑疾親嘗湯藥及終哭泣盡哀以夫不能遽歸乃易粧奩營棺衾以禮成葬凡宗族鄉黨皆稱其孝

賀氏侯廷芳妻事姑任氏以孝聞姑患齒疾不食者五日賀氏割左股煎湯入藥奉姑漱齒乃愈賀氏尋以疾終遺子繩武年甫五歲甲午中鄉試

李氏大學士李天馥妻姑染病氏割股以進姑遂愈

高氏文學李式標妻舅病氏佐夫視湯藥日夜無懈姑患背疽侍湯藥必親嘗籲天願以身代姑遂愈歲當大祲氏脫簪珥佐夫賑濟

陳氏文學洪東煥元配處士廷言之女也及爲洪氏婦善事姑舅其姑田孺人曰新婦惟勤惟慎能先意承顏使我得從容就理嗣後姑孀居孝養愈隆問衣佐餽無敢少懈姑病助夫侍湯藥經歲不倦姑卒哭毀盡哀葬祭盡禮始終如一

侯氏太醫院判張思禮妻事姑丁氏備極孝謹姑病劇禱神祈壽願不徧甘素病遂愈姑卒哀慟過甚氣數絕是

之不已乃繪姑容朝夕拜禮一果一蔬必先獻而後食
所謂事死如生事亡如存者

胡氏王璽妻璽幼失怙家甚貧逐微利嘗營於外氏勤儉
持家事姑茅氏奉養無缺得親懽心姑老齒落艱於飲
食氏以乳供之久無怠忘姑沒晨昏號泣遂病卒

張氏貢生張雯生女舉人趙作鼎妻也氏幼通內則事姑
舅以孝聞其姑張氏病百藥不效氏思古有割肉療親
者乃焚香告天割股煎湯以進姑危而得安氏尋以疾
終

高氏生員李憲祖妻夫卒氏方二十四歲姑老在堂幼子

方提抱氏訓子孝姑姑染重病氏敬奉湯藥衣不解帶者兩閱月始賴以安氏以勞致疾卒之日謂其子炳曰汝幸成立苟能孝敬祖母吾可無恨

徐氏歲貢生呂抒元配江南宿州歲貢生徐熙時女事舅姑櫛饋問視盡誠盡孝無懈志無怠容質孱弱多病當劇時猶囑娣姒云兩親垂白惟善事之吾死始瞑目歿之日子先發甫七歲及成立家聲漸起皆氏之貽也

唐氏翟應乾妻其姑病思食肉時大水罷市且貧如洗氏焚香告天引刀割股煎湯進姑食之病愈

潘氏順天宛平儒家女廉憲胡公一龍妻于歸後太母在

堂性嚴厲氏承顏順旨曲得懽心丙子春流冠束來廐
盡公欲入城爲守禦計途遇賊公義氣激烈揮劍躍馬
逐之遂遇害氏問信哀慟不食者四日誓以死殉太母
慰之曰死易耳姑老子幼詎可以一死謝乎因幡然易
慮願爲其難者未幾太母患病飲食藥餌委曲調護病
良已太母曰無以報三願汝之子孫皆若汝之孝而已
及丙辰子詔虞成進士喜且悲曰吾事畢矣可以報吾
夫於地下矣苦節四十年辛酉二月無疾終

萬氏監生李世坦妻事姑沈氏以孝聞夫歿撫孤子著苦
節萬氏嘗曰吾姑撫吾夫節良苦惟是朝夕奉養吾姑

者不可不周每先意順志得其懽心後沈氏年躋八旬
萬氏亦近六十執婦道四十餘年無少懈沈氏病篤萬
氏奉湯藥目不交睫衣不解帶者累月及卒哀毀盡禮
積勞成疾越年餘亦卒

賀氏庠生張遷善妻孟縣知縣張佳珩母也事姑至孝二
十餘年無倦姑卧病晝夜扶持寢食俱廢者百餘日因
積瘁成疾姑歿哀毀不起越月餘卒

胡氏進士胡詔虞女歲貢生李昌齡妻事舅姑以孝聞昌
齡父侍御李應昌卒氏奉姑二十餘年如一日姑暮年
多病晝夜湯藥衣不解帶數十晝夜及姑病劇而氏已

形枯力盡矣姑甫終哀毀哭泣一慟幾絕既殮之日撫棺長號嘔血而卒卒年五十三

劉氏生員高望衍妻善事舅姑飲食必求其如意者以進病則親嘗湯藥晝夜在側無怠容一時翕然稱爲孝婦衍逾四十無子氏爲再聘生三男撫育不啻己出焉邑令旌其門曰克進婦道又曰坤德裕後

以上舊志

李氏繩非女生員張霄暄妻姑病醫藥罔效氏割股飼之姑病愈氏不知痛苦侍奉如常年登大臺

侯氏二品銜四品卿銜候選道呂永輝妻商邱封職鑰友平日事舅姑以孝謹稱姑陳太夫人病侯氏割股和藥

以進病遂愈中丞涂奏准旌表建坊

竇氏心聖女王貴三妻同治元年正月初三日氏姑李氏住屋不戒於火氏夫他出氏姑雙瞽在室氏冒火衝入負姑而出火已燎其髮膚姑幼子王馬方九歲卧病在牀氏姑悲啼呼救氏反身入火竟至焚死

邢士貴妻孟氏翁良德病氏割臂煮湯以進翁病愈氏於光緒二十二年四月十三日以創死

萬邦瀛門斗年枝子妻王氏嫁二載而邦瀛故光緒二十五年翁病咽膈氏割乳旁肉煮湯以進翁病終無救氏瘡逾年乃愈

貢生姬隆澧妻李氏在閨卽以孝聞及事翁姑人無間言
一日姑病幾危氏長跪籲天願以身代越日姑病遂愈
僉稱孝感云



光緒永城縣志卷二十九

列女志

節婦

明

齊氏孝廉張孜繼室也孜卒於官氏年十九扶柩歸葬懷
娠五月生男紹先苦節教子入邑庠年僅二十四亦卒
妻李氏少紹先二歲撫孤未幾子又夭兩世苦節追姑
年七十始卒李哀毀以禮葬紡織餬口年逾七旬終

王氏俞寶妻年二十六寶卒男方週歲翁姑欲改適王以
死自誓勤紡績以事公姑年逾七旬卒縣令劉公書貞